

---

---

**В. Г. Тунян**, Фальсификация истории восстановления армянской государственности в азербайджанской историографии, Ереван, Издательство ЕГУ, 2018, 396 с.

**Վ. Գ. Թունյան**, Հայկական պետականության վերականգնման պատմության կեղծումը ադրբեջանական պատմագրության մեջ, Երևան, ԵՊՀ հրատարակչություն, 2018, 396 էջ

ՀՀ ԳԱԱ պատմության ինստիտուտի առաջատար գիտաշխատող, պատմական գիտությունների դոկտոր, պրոֆեսոր Վալերի Թունյանի արժեքավոր մենագրությունը ներկայացնում է ադրբեջանական պատմագրության՝ 1918-1924 թթ. հայկական պետականության ձևավորման պատմության կեղծարարությունները: Հեղինակը դասակարգում է Կովկասի, մասնավորապես Հայաստանի պատմությանն առնչվող կեղծիքները, ցույց է տալիս, թե ժամանակի ընթացքում ինչպիսի փոփոխություններ են դրանք կրել, և ինչ նոր միտումներ են ի հայտ եկել: Պատմության կեղծարարությունը և պատմական փաստերի խեղաթյուրումը ադրբեջանական քարոզամեթոդային կարևոր գործիքներն են, ուստի դրանց համալիր ուսումնասիրությունը մեծ կարևորություն է ներկայացնում ժամանակակից տեղեկատվական պատերազմի համատեքստում:

Ներկայումս Ադրբեջանը Հայաստանի Հանրապետության հետ առճակատման մեջ է միանգամայն տարբեր՝ քաղաքական, տնտեսական և քարոզչական ասպարեզներում, որոնցից յուրաքանչյուրն ունի իր նշանակությունը: Ի դեպ, քարոզչական պատերազմը բացահայտորեն ուղղորդում և հովանավորում են Ադրբեջանի իշխանությունները: Երկրի առաջին դեմքի շուրթերից բազիլցս հնչել է, որ Երևանը, Ջանգեզուրը և Սևանը անհրաժեշտ է «վերադարձնել»:

Հատկանշական է, որ Ադրբեջանում պետական մակարդակով հովանավորվող հակահայկական քարոզչության հիմնական նպատակներից է նաև հայկական հետքի բացառումը կովկասյան տարածաշրջանում: Գաղտնիք չէ, որ Ադրբեջանի իշխանությունները մեծ գումարներ են հատկացնում պատմական անցյալի խեղաթյուրման գործին՝ տարածաշրջանում իրենց «բնիկության» և հայերի «եկվորության» վերաբերյալ անհիմն թեզերն առաջադրելու և «հիմնավորելու» համար: Այդ համատեքստում առանձնակի կարևորվում է Վ. Թունյանի սույն մենագրությունը, որտեղ փաստական հարուստ նյութի հիման վրա համակողմանի ներկայացված են ուսումնասիրվող ժամանակաշրջանում ազերի «գիտնականների» միտումները:

Առաջին գլխում Վ. Թունյանը քննարկում է ադրբեջանական պատմագրության մեջ շրջանառվող՝ 1918-1920 թթ. Հայաստանի առաջին Հանրապետությանը վերաբերող քարոզչական թեզերը: Նա քննարկում է Հայաստանի անկախության հռչակումից առաջ և հետո տարածաշրջանի իրադրությանն առնչվող ադրբեջանական պատմագրության տարբերակը՝ հայկական մոտեցման համատեքստում: Նրա ներկայացրած աղյուսակային սխեմայի շնորհիվ (էջ 17, 22 և այլն) պարզ նշմարելի է դառնում ադրբեջանական պատմագրության մեջ ակտիվորեն շահարկվող կեղծարարության փաստը: Հեղինակը իրավացիորեն հանգում է հետևյալ եզրակացության. «Առաջին հանրապետության սահմանների ձևավորման վերաբերյալ առասպելների հետազոտությունը ցույց է տալիս դրանց խիստ քաղաքականացվածությունը, իրական պատմությունը խեղաթյուրելու ձգտումը և ի հայտ է բերում տարածքային կազմաձևման ոչ օբյեկտիվ տեկտոնիկան՝ թաքցնելով տարածաշրջանում «Մեծ Ադրբեջան» ստեղծելու միտումը» (էջ 40):

Վ. Թունյանը բացահայտում է Հայաստանի առաջին Հանրապետության իրավիճակի բարդությունը՝ ի դեմս տարբեր բաղկացուցիչներ պարունակող աշխարհաքաղաքական մենակատարության, ինչպիսիք են «Մեծ Ադրբեջանը», «Մուսուլմանական Կովկասը», «Վրացական նախագիծը», «Միացյալ Հայաստանը», Անդրկովկասյան ֆեդերացիան, տարբեր ձևերով Ադրբեջանի միությունը Թուրքիայի և Պարսկաստանի հետ: Նա գտնում է, որ 1918 թ. Հայաստանի Հանրապետության ստեղծումից ի վեր երկիրը գտնվում էր ժամանակագրական բախումների շրջապտույտում, որոնք պայմանավորված էին նրա անկախության նկատմամբ հարևան երկրների աշխարհաքաղաքական նկրտումներով: «1920 թ. սկզբին Անտանտը փաստացիորեն ճանաչեց Հայաստանի Հանրապետությունը,– գրում է նա,– սակայն նրա սահմանները հարևան երկրների հետ և Արևմտյան Հայաստանի ճակատագիրը մնացին անորոշ: Հայկական հարցի լուծումը տեղափոխվեց Անտանտ-Խորհրդային Ռուսաստան-քեմալական Թուրքիա աշխարհաքաղաքական հարթություն: Հայկական քաղաքական ռազմավարության օրակարգում միացյալ Հայաստանի ստեղծման խնդիրն էր, իսկ Արևմուտքի երկրները ձգտում էին ստեղծել աշխարհաքաղաքական նոր կենտրոն» (էջ 92-93):

Երկրորդ գլխում Վ. Թունյանը ներկայացնում է Ադրբեջանի խորհրդայնացումից հետո Հայաստանի առաջին Հանրապետությանը և տարածաշրջանային զարգացումներին առնչվող՝ ադրբեջանական պատմագրության մեջ շրջանառության մեջ դրված հիմնական կեղծ թեզերը: Նա քննության է առնում դրանց հեղինակների, այդ թվում՝ պատմական կեղծարարությունների հարուստ փորձ ունեցող Ա. Բալասի, Ռ. Է. Իսմայիլովի, Ջ. Հասանլիի և այլոց աշխատությունները և իրավացիորեն արձանագրում. «Հայաստանի գավթողական ծրագրերին առնչվող առասպելը հակվում է դեպի այն թեզը, թե հայկական զինված ուժերը ներխուժել են Ջանգեզուր, Ղարաբաղ և Ադրբեջանի հյուսիսարևելյան շրջաններ» (էջ 97):

Վ. Թունյանը անդրադառնում է նաև տարբեր պայմանագրերի կեղծարարությունների ուսումնասիրությանը, ցույց տալիս, որ ադրբեջանցի պատմաբանները կեղծում են 1920 թ. օգոստոսի 10-ի Սևրի և Թիֆլիսի, ինչպես նաև 1920 թ. օգոստոսի 24-ի ռուս-թուրքական պայմանագրերի բովանդակությունները: Նրանք արհամարհում են Սևրի պայմանագրի և դարաբաղյան խնդրի միջև կապը: Թիֆլիսի պայմանագիրը, որը կոչված էր Հայաստանի առաջին Հանրապետության և Ռուսաստանի Խորհրդային Դաշնային Սոցիալիստական Հանրապետության միջև հարաբերությունների կայունացմանը, նրանք դիտում են քեմալական Թուրքիայի նկատմամբ հայկական սպառնալիքի լույսի ներքո: Հեղինակը քննադատաբար ներկայացնում է նաև միայն ի հաշիվ հայկական հողերի՝ Ղարաբաղի, Զանգեզուրի և Նախիջևանի, Ադրբեջանում խորհրդային իշխանության պահպանման հնարավորության առասպելը (էջ 203):

Մենագրության երրորդ գլուխը նվիրված է խորհրդա-քեմալական «մեզայանսին» առնչվող առասպելների ուսումնասիրությանը: Այն ընդգրկում է Հայաստանի խորհրդայնացման շրջանի և դրան հաջորդող փուլերի վերաբերյալ կեղծարարությունների մանրակրկիտ քննարկումը: Հավատարիմ իր գործելաոճին՝ Վ. Թունյանը հստակ փաստերով և համակարգված ներկայացնում է ադրբեջանական խեղաթյուրումները և արձանագրում դրանց քարոզչական հետևանքները: Նա զուգահեռներ է անցկացնում Հայաստանի Հանրապետության խորհրդայնացման և հետխորհրդային հայկական պետականության առասպելագործության միջև: «Ադրբեջանցի պատմաբանների առասպելագործությունը Անդրկովկասում հայկական պետականության մասին՝ ցարական Ռուսաստանի անկումից հետո և ԽՍՀՄ-ի կազմավորման սկզբնական շրջանում,– գրում է նա,– իր հիմքում ունի ՌԽՖՍՀ-ի, Թուրքիայի և Ադրբեջանի միջև հայկական հողերի վերաբաժանման ծրագրերի և դիտավորությունների վերածննդի պատմական պատրանք: Անցյալի առասպելների հետադարձ հայացքը արդիականության վրա նպատակ ունի հիմնավորելու Ադրբեջանի՝ Հայաստանի Հանրապետության և հարևան պետությունների դեմ ուղղված ագրեսիվ արտաքին քաղաքականությունը» (էջ 379):

Վերջաբանը ներառում է հեղինակի կատարած աշխատանքի ընդհանրացումները: Ադրբեջանի պատմահոգեբանական պատերազմի համար առանձնացված են հասարակության մեջ այլատյացությունը, հայերի նկատմամբ դրական վերաբերմունքի արգելումը, պետական իշխանության կողմից հայատյացության քարոզչությունը բարձր մակարդակով, պատմական անցյալի հանդեպ հորինվածքները և այլն:

Մեզ իրավունք ենք վերապահում խորհուրդ տալ հեղինակին երբեմն խուսափել հուզական ձևակերպումներից, քանի որ հարուստ փաստերի հիման վրա շարադրված նրա մենագրությունը ունի օբյեկտիվ և հստակ եզրակացություններ ադրբեջանական պատմագրության բազմաթիվ կեղծարարությունների առնչությամբ:

Գրախոսվող գիրքը ունի պատմական և քաղաքագիտական կարևոր նշանակություն, ուստի այն կարող է օգտագործվել թեմատիկ դասավանդման համակարգերում, ինչպես նաև իբրև փաստագրական նյութ՝ տարբեր ոլորտներում գիտահետազոտական աշխատանքների իրականացման, մասնավորապես՝ ներկայիս քաղաքական գործընթացների վերլուծության և կանխատեսումների համար: Այն, անտարակույս, օգտակար է նաև ՀՀ համապատասխան պատկան մարմինների համար՝ աղբյուրների քարոզչության դեմ մղվող քաղաքականություն մշակելու գործընթացում:

Վ. Թունյանի մենագրությունը գրված է մատչելի լեզվով, ինչը հիմք է տալիս եզրակացնելու, որ այն կարող է հետաքրքրություն ներկայացնել մեր հասարակության լայն շրջանակների համար: Այս ամենը վկայում է նրա գիտական բարձր մակարդակի, բարդ խնդիրների վերաբերյալ լուծումներ գտնելու և բազմակողմանի վերլուծություն իրականացնելու ունակության մասին:

*ՏԱԹԵՎԻԿ ՀԱՅՐԱՊԵՏՅԱՆ*

Ներկայացվել է 09.09.2019

Ընդունվել է տպագրության 05.11.2019